



KIMIAD AR MARTOLOD BRETON O VONT D'AR CHIN

Vel eur gwe-lan lein an oa-blou Ma lestr e we-liou di-
gor zo gwen-tet gant an a-ve-liou Pell di-meuz o-ehou Ar-vor.

'Vel eur gouelan, 'lein an oablou,
Ma lestr e oueliou digor
Zo gwentet gant an aveliou
Pell dimeuz ochou Arvor.

Dizeblant ouz an disparti,
Ar vartoloded a gân ;
O sperejou 'zo dizoursi,
Ma hini-me 'zo en poan.

Ma c'halon baour a zo gwasket
Gant ar bec'h ar pounneran,
N'oun pe drouk enni 'zo skoet
Pa 'meuz tolet troad aman.

Pignet en beg ma gwern uhel,
Na zistagfen ket ma zell,
Na pa vije red d'in mervel,
Diouz douarou Breiz-Izel.

Pa welan 'vel eur vogeden
O teuzi ochou Arvor;
Ma daerou taken-ha-taken
A goue goustadik er môr.

A-hoan e tarz c'hoaz an douar
'Tre an dour hag ar goabren ;
Kenavo, Breiz, ma mamm, ma c'hoar,
Ma c'harante da viken !

Me da gar ha n'hen gouien ket ;
Kousket en poull ma c'halon,
Ma c'harante zo dihunet
Breman ha hi krê ha don.

Kenavo 'ta, reier, dero,
Kenavo traez ha bili,
Rag hirie me a zoug kanvo
D'ac'h holl hini ha hini.

Kenavo, touriou, iliz koant,
Ha kilheier lugernus,
'Glevin ken ho kleier arc'hant
O seni an Angelus.

Kenavo, ma ziik balan !
Me wel duze, 'toull da zor,
Eur vamm glac'haret o ouelan
He zellou troet er môr.

Kenavo, ma bagik vihan,
Pell e vezi 'n es kourve,
Disliv ha reud en es lian
Evel eur c'horf hep ine.

Na gouskin ket nozveziou hanv,
Ennoud evel 'n eur c'havel,
Ar wagen dindan o kanan,
Hag an avel o luskel.

Trouz ar c'hanol 'vel eur c'hurun,
Ha skrij trompilh an argad,
A deuyo bemde d'am dihun
Ha bep noz d'am luskellad.

Kenavo, Breiz, a greiz kalon,
Kenavo, Breiz, a bouez pen ;
Da hano a dougin, breton,
'Vel ar groaz 'zo 'n em c'herc'hen.

Ha gant ar groaz en e vruched
Ha da hano 'n e c'heno,
Da vab na vo biken trec'het
Nemet gant dorn ar maro.

DIR-NA-DOR.